

DIARIO**Hubentud den movecion**

pa Mercedes Monge

Lema: "Amistad traha storia hunto"

Biblioteca ta preparando caba pa e di 26 Festival di Buki pa Mucha



Director di Biblioteca Nacional, sra. Astrid Britten, a duna di conoce cu tur cos ta cla pa e di 26 Festival di Buki di Mucha. E Festival lo tuma lugar na Luna di November proximo, dia 2 ta cuminza patras di e edificio na George Madurostraat. Durante e transcurso di e siman di e Festival lo tin bishita di e autornan na e diferente scolnan, y sra. Britten a menciona cu e interes ta grandi di parti di scolnan tambe.

E clausura lo tuma lugar su siguiente siman Diabierna 9 di November.

TEMA:

Sra. Josmar Maduro- Sneek, Coordinador di e Festival, a hiba palabra y a indica cu e aña aki e tema ta AMISTAD. Biblioteca a tuma e mesun tema di Hulanda. Den e cuadro di Papiamento e lema ta: "Amistad, traha storia hunto". Esaki ta e tema cu tur autor lo bay trata, y amistad no solamente entre e sernan humano, pero entre hende cu bestia, bestia cu bestia, pues tin un multitud di fantasia cu por traha storia cune, bao e tema di Amistad y e lema

"Amistad, traha storia hunto".

E aña aki tambe lo bay tin tayernan di trabao pa maestronan tanto di kleuterschool como scol basico y scolnan special. Nan por inscribi y manera semper e tayernan ta gratuito. E fecha ta di 17 pa 20 di September, y aki e maestronan ta bay haya informacion tocante e autornan cu ta bay participa e aña aki.

Sra. Sophiene Maduro a duna di conoce cu tambe lo haya informacion con nan tin cu ta prepara pa ricibi e autornan na scolnan. Tur aña nan ta traha un "les paket crioyo" cu ta adapta na e situacion na Aruba.

Mescos cu tur aña ora un mucha cumpra un buki den un bookhandel nan ta haya un buki gratis. E buki aki ta skirbi pa e autornan di Hulanda riba e tema amistad. Lo tin 15 autor cu ta skirbi storia of poesia cu hunto lo skirbi e buki, y un artista di Aruba mes, Vanessa Paulina lo ilustra esaki.

Ta prome biaha cu varios autor ta skirbi un buki. Esaki ta casi cla pa wordo imprimi pa e yega Aruba na tempo.